


VI
PREMIU DE
NOVELA CURTIA
ANDRÉS SOLAR
SANTURIO
2026



*Al otro día pela mañana yá la xente
andaba bien ceo arremolinao
pelos caminos y falando a
tou, falar de tantas cosas
nueves, como taben
pasando... Soledá
lloviu. Soledá
mar. Soledá
ríu...*





ANDRÉS SOLAR SANTURIO

Deva (Xixón)

25/08/1955 - 27/12/1984

Ta consideráu ún de los meyores escritores del Surdimientu. Nel añu 1978 entró en Conceyu Bable y entamó a publicar artículos na sección *Alitar Asturias* que tenía l'asociación nel diariu El Comercio. Col correr de los años, ganó dellos premios lliterarios como'l Premiu de Cuentos Curtios del Institutu Jerónimo González de Sama (Llangréu) en 1979 y 1980, el Segundu Concursu de Narraciones curties n'asturianu entamáu pola Diputación d'Asturies (1981), el Concursu de Cuentos n'asturianu del Club Cultura d'Uviéu (1982) o el primer Concursu de Cuentos del Conceyu de Llanes (1984).

Dientro de la so obra lliteraria alcontramos cuentos, poemes, novela curtia y ensayos. Grupos como Dixebrá o Skama la Rede punxeron música a poemes d'Andrés Solar.

En 1983 nomáronlu académicu de númberu de l'Academia de la Llingua Asturiana, cargu que rechazó por tar «poco estudiáu». Amás esi mesmu añu participó na creación de la Xunta d'Escritores asturianos. Y foi de los primeros en poner clas de llingua asturiana na Universidá Popular de Xixón.

Morrió en 1984, con 29 años, nun accidente de tráficu.

Ente los actos pa facer alcordanza de la so figura destaquen los Premios Andrés Solar (creaos pola Xunta pola Defensa de la Llingua Asturiana en 1985), el llibru publicáu pola ALLA onde se recueyen les sos obres inédites, la esposición «Andrés Solar: el llabrador de pallabres» fecha pola Fundación Municipal de Cultura de Xixón o la XXV Selmana de les Lletres dedicada a esti autor.



VI PREMIU DE NOVELA CURTIA ANDRÉS SOLAR SANTURIO 2026

BASES

1.- OXETU

El premiu Andrés Solar Santurio tien l'envís de premiar aquella obra lliteraria orixinal n'asturianu que rescample pola so calidá.

2.- PARTICIPANTES/ CANDIDATURES

2.1.- Van poder optar al «PREMIU DE NOVELA CURTIA ANDRÉS SOLAR SANTURIO» les obres que cumplan estos requisitos:

- tar escrites por autores mayores d'edá.
- tar escrites n'asturianu siguiendo les normes ortográfiques de l'Academia de la Llingua Asturiana.
- tener una estensión mínima de 75 páxines y una estensión máxima de 130 páxines.
- tar presentaes en DIN A4 (210 x 297 mm) a doble espaciu, per una cara y cuerpu de lletra Times New Roman 12 o asemeyáu.

2.2.- L'autor o autora habrá presentar la **declaración responsable** que s'axunta como anexu nesti QR.



3.- PLAZU Y FORMA DE PRESENTACIÓN DE CANDIDATURES

3.1.- El plazu pa la presentación de les candidatures va entamar a contar dende'l día siguiente a la publicación del estractu d'esta convocatoria nel Boletín Oficial del Principáu d'Asturies y va rematar el **10 de setiembre de 2026**.

3.2.- La presentación d'orixinales va poder facese per estos medios:

a) **Per Internet.**

Al traviés del corréu electrónicu: **premiuandressolar@xixon.es** indicando:

- Nel asuntu: "**PREMIU DE NOVELA CURTIA ANDRÉS SOLAR SANTURIO 2026**"
- Nel cuerpu del mensaxe: **títulu de la novela** y el **nomatu del autor o autora**.
- En documentos axuntos: hai qu'incluyir la novela en formatu PDF nun documentu y n'otru -aparte- los datos personales: nome, apellíos, seños, teléfonu y corréu electrónicu, amás de la declaración responsable.

b) **Per corréu postal.**

Van unviase 2 sobres nos qu'han de figurar el nome del premiu «**PREMIU DE NOVELA CURTIA ANDRÉS SOLAR SANTURIO 2026**», y tamién el **títulu de la obra** y el **nomatu del autor o autora**, con esti conteníu:

- Sobre A: Datos del autor o autora (nome y apellíos, seños y teléfonu), amás de la declaración responsable.
- Sobre B: Orixinal y 3 copies del testu en DIN A4 (210 x 297 mm), a doble espaciu, per una cara y cuerpu de lletra Times New Roman 12 o asemeyáu.

A estes seños:

Rexistru de la Fundación Municipal de Cultura, Educación y Universidá Popular C/ Xovellanos, 21. 33201, Xixón

3.3.- Los orixinales presentaos al concursu van devolvase, previu pidimientu per escritu del autor o autora nos dos meses siguientes al fallu del Xuráu, presentando'l xustificante de Correos qu'acreite l'autoría de la obra. Les obres que nun se reclamen primero del 2 de marzu de 2027 van destruyise.

3.4.- El Conceyu de Xixón resérvase'l derechu de publicar la primer edición de la obra premiada, dando por retribuyíos col premiu los derechos d'autor d'esta primer edición.

4.- XURÁU Y VOTACIÓN

4.1.- El fallu del premiu va corresponder a un Xuráu compuestu por persones venceyaes al mundu de les lletres asturianes, designaes llibremente por Resolución de la Presidencia de la Fundación Municipal de Cultura, Educación y Universidá Popular del Conceyu de Xixón.

La so composición va dase a conocer cuando se produza'l fallu que va facese públicu n'avientu de 2026, coincidiendo col cabudañu d'Andrés Solar Santurio. Va actuar como secretaria la Xefa del Departamentu de Normalización Llingüística del Conceyu de Xixón.

Na composición del Xuráu va garantizase que'l personal cuente

con capacidaes y formación en materia d'igualdá; acordies colo conseñao nel art. 22.4 de la Ordenanza d'Igualdá ente Mueres y Homes del Conceyu de Xixón (BOPA 4 d'agostu de 2023).

La composición del Xuráu va cumplir el principiu de composición equilibrada nos términos establecíos na Llei Orgánica 3/2007, de 22 de marzu, pa la igualdá efeutiva de mueres y homes, pola que va procurase la presencia de mueres y homes de forma que, nel conxuntu al que se refiera, les persones de cada sexu nun perpasen el sesenta por cientu nin seyan menos del cuarenta por cientu; acordies colo conseñao nel art. 7 de la Ordenanza d'Igualdá ente Mueres y Homes del Conceyu de Xixón (BOPA 4 d'agostu de 2023).

4.2.- Resérvase'l derechu a modificar el Xuráu mentáu.

4.3.- Les persones que formen parte del Xuráu van tar sometíes al deber d'astención nos casos señalaos nel art. 23 de la Llei 40/2015, de 1 d'ochobre, de Réxime Xurídicu del Sector Públicu.

4.4.- El fallu del Xuráu, que va ser inapelable, va facese públicu cola so publicación na Sede Electrónica del Conceyu de Xixón, ensin perxuiciu d'otres publicaciones que se valoren oportunes.

4.5.- El premiu podría quedar ermu, si asina lo decidiera'l Xuráu.

4.6.- La persona que resulte ganadora va formar parte del Xuráu de la convocatoria viniente.

5.- PREMIU

Establezse un únicu premiu por importe de 3.000,00 € pa la obra que por unanimidá o nel so defectu, pola mayoría de los votos del xuráu, algame los mayores méritos. Sobre esta cantidá van facese les retenciones fiscales pertinentes.

Esta cantidá nun va suponer en ningún casu la cesión o limitación de los derechos de propiedá de la obra premiada, incluyíos los derivaos de la propiedá intelectual.

6.- DERECHOS D'IMAXE

La persona ganadora autoriza l'usu del so nome y la so imaxe con fines publicitarios col envís de llograr el mayor esparidmientu del premiu.

7.- NORMATIVA DEL PROCEDIMIENTU

7.1.- Esta subvención nominativa inclúyese nel Plan Estratéxicu de Subvenciones del Conceyu de Xixón 2024-2026, actualizáu pal 2025 pol Alcuertu de la Xunta de Gobiernu Local de 27 de mayu de 2025, incorporándose nel Oxetivu Estratéxicu 5: Promoción de la cultura, la educación y el deporte. Llinia 1: Promoción cultural. Llinia de Subvención 1.3: Contribución al desarrollu de la espresión lliteraria. Subvención 4: Premiu Novela Curtia Andrés Solar, con importe de 3.000,00 €.

7.2.- Esta convocatoria va rexise pol Real Decretu 887/2006, de 21 de xunetu, pol que s'aprueba'l Reglamentu de la Llei 38/2003, de 17 de payares, Xeneral de Subvenciones, y tamién pola Ordenanza Xeneral de Subvenciones del Conceyu de Xixón espublizada nel BOPA n.º 40 de 28 de febreru de 2023 y pola Llei 40/2015, de 1 d'ochobre, de Réxime Xurídicu del Sector Públicu.

Tamién va tener que cumplir la normativa vixente que-y resulte d'aplicación y, n'especial, la Llei Orgánica 3/2007, de 22 de marzu, pa la igualdá efeutiva d'homes y mueres (BOE n.º 71 de 23 de marzu de 2007) y la Llei del Principáu d'Asturies 2/2011, de 11 de marzu, pa la igualdá de mueres y homes y el desaniciu de la violencia de xéneru (BOE n.º 106 de 4 de mayu de 2011), poles que, ente otros coses, queda prohibida toa discriminación direuta o indireuta basada nel sexu de les

persones, acordies cola Ordenanza d'Igualdá ente Mueres y Homes del Conceyu de Xixón (BOPA n.º 150 de 4 d'agostu de 2023) teniendo los beneficiarios y les beneficiaries qu'establecer midíes y actuaciones empobinaes a promover la igualdá ente mueres y homes.

7.3.- El premiu va concedese acordies colos principios de publicidá, transparencia, concurrencia, oxetividá, igualdá y non discriminación.

8.- INSTRUCCIÓN DEL PROCEDIMIENTU

8.1.- El Departamentu de Normalización Llingüística de la Fundación Municipal de Cultura, Educación y Universidá Popular del Conceyu de Xixón va adoptar toles midíes necesaries pal desarrollu de les bases y d'esta convocatoria, faciendo la ordenación y instrucción del procedimientu.

8.2.- El Departamentu de Normalización Llingüística va evaluar l'impautu de xéneru d'esta convocatoria según los indicadores: númberu añal de participantes estremando'l sexu y la edá; númberu d'escriitores que concursen per primer vegada; númberu d'escriitores que yá concurrieren a otros premios.

8.3.- La Direición de la Fundación Municipal de Cultura, Educación y Universidá Popular del Conceyu de Xixón va elevar el fallu del Xuráu a la Presidencia de la mentada Fundación nel plazu máximu de 10 díes dende l'adopción del mesmu per parte del Xuráu.

9.- CONCESIÓN DEL PREMIU

9.1.- La Presidencia de la Fundación Municipal de Cultura, Educación y Universidá Popular del Conceyu de Xixón va firmar la Resolución recoyendo'l fallu del Xuráu.

La Resolución nun agota la vía alministrativa y, en virtú de lo conseñao

na Llei 39/2015, de 1 d'ochobre, del Procedimientu Alministrativu Común de les Alministraciones Públiques, contra'l presente actu pue interponese énte l'Alcaldía del Conceyu de Xixón, el recursu ordinariu d'alzada reguláu nos arts. 121 y 122 de la llei mentada, nel plazu d'un mes a cuntar dende'l día siguiente a la notificación. Pasáu'l plazu de tres meses ensin que recaiga resolución a poder entendese desestimáu.

9.2.- El premiu va entregase n'actu públicu.

10.- PROTECCIÓN DE DATOS PERSONALES

10.1.- Acordies colu conseñao nel Reglamentu UE 2016/679, de 27 d'abril de 2016, los datos de calter personal que faciliten los candidatos y candidates van tratase col envís de xestionar la so participación nel premiu, siendo la base llexitimadora del tratamientu l'interés llexítimu de les partes en facilitar la presentación de les obres al premiu acordies con estes bases. Los datos nun van cedese a terceros sacante nos casos en qu'esista una obligación llegal.

10.2.- Información básica sobre protección de datos:

Responsable: Conceyu de Xixón.

Finalidá: Los datos personales ufiertaos van usase pa la prestación de servicios públicos acordies colos procedimientos.

Derechos: Van poder exercitase los derechos d'accesu, igual, supresión, oposición y limitación del tratamientu al traviés de la nuestra «Política de Privacidá» onde hai un enllaz a modelos normalizaos.

Información adicional: Pue consultase la información adicional de protección de datos nel apartáu «POLÍTICA DE PRIVACIDÁ» de la Sede

Electrónica del Conceyu de Xixón, accediendo a [Política de privacidad](#).

11.- ANUNCIOS, PUBLICACIONES Y CÓMPUTO DE PLAZOS (art. 45.1 b. LLPACAP)

11.1.- Tolos anuncios y notificaciones que deriven d'esta convocatoria van notificase per aciú de la publicación nel apartáu de Subvenciones/ Concursos y Premios de la **Sede electrónica del Conceyu de Xixón. Sede electrónica Ayuntamiento de Gijón. Concursos y Premios**

De la regla xeneral anterior queda escluyida la publicación del extractu de la convocatoria, que va facese nel **Boletín Oficial del Principáu d'Asturies**, too ello ensin perjuiciu d'otres publicaciones o comunicaciones que se valore conveniente realizar, nun teniendo nenguna d'estes publicaciones validez a efectos de cómputos del plazu.

Tamién s'esceptúa la notificación de la Resolución de la Presidencia de la Fundación Municipal de Cultura, Educación y Universidá Popular del Conceyu de Xixón recoyendo'l fallu del Xuráu, que va facese per aciú de publicación d'anunciu nel **Tablón d'Edictos Electrónicu** del Conceyu de Xixón ([Sede electrónica Ayuntamiento de Gijón. Tablón de Edictos](#)).

11.2.- **Publicidá de la convocatoria.** La publicidá de la convocatoria va facese al traviés de la **Base de Datos Nacional de Subvenciones** a la que correspuende la so publicación nel **Boletín Oficial del Principáu d'Asturies**.

N'espublizandu l'extractu nel Boletín Oficial del Principáu d'Asturies o trescurriés 72 hores desque se ponga a disposición del diariu oficial, la Base Nacional de Datos de Subvenciones va

ufiertar tola información referente a la convocatoria al traviés del Sistema Nacional de Publicidá de Subvenciones que se materializa al traviés del sitiu web [SNPSAP](#).

La convocatoria tien efeutu dende la publicación del extractu de la convocatoria nel Boletín Oficial del Principáu d'Asturies.

11.3.- **Publicidá de los premios concedíos y más información rellacionada.** Igualmente, en cumplimientu de lo conseñao nos arts. 18 y 20 de la Llei Xeneral de Subvenciones y normativa de desarrollu, va unviase a la **Base de Datos Nacional de Subvenciones** la información relativa a la concesión de los premios, que va tener que s'entregar enantes de que remate'l mes natural siguiente al de la so producción.

11.4.- **Pal cómputu de los plazos va tase a lo conseñao nos arts. 29 y siguientes de la LLPACAP.** Si l'últimu día del plazu establecíu fuera inhábil, va entendese prorrogáu al primer día hábil siguiente.

12.- RECURSOS Y IMPUGNACIONES

Esta convocatoria va poder recurrise nos términos conseñaos na LLPACAP.

13.- CLÁUSULA XENERAL

La participación nesti premiu supón l'aceutación de tollos puntos incluyíos nes bases. De nun cumplise los requisitos señalaos nestes bases, la candidatura podría nun llograr el premiu.



VI PREMIU DE NOVELA CURTIA **ANDRÉS SOLAR SANTURIO** 2026

CONVOCATORIA

El premiu de novela curtia «Andrés Solar Santurio» vien convocándose añalmente pola Fundación Municipal de Cultura, Educación y Universidá Popular del Conceyu de Xixón dende 2021, cola cuenta de favorecer y promover la creación lliteraria n'asturianu y la so normalización social.

Pola presente convócase'l sestu «PREMIU DE NOVELA CURTIA ANDRÉS SOLAR SANTURIO» correspondiente al añu 2026, d'alcuerdu coles bases que vienen darréu.

PRESENTACIÓN D'ORIXINALES

Dende'l día siguiente a la publicación d'estes Bases nel BOPA hasta'l 10 de setiembre de 2026.